

14. april 2016

Kulturikkut ingerlatsineq sunngiffimmilu sammisassaqtitsineq pillugit Inatsisartut inatsisaat nr. xx.xx 2016-imeersoq
(Ilinniartitaanersut, Kultureqarnermut, Ilisimatusanermut ilageeqarnermullu Naalakkersuisoq)

Kulturikkut ingerlatsineq sunngiffimmilu sammisassaqtitsineq pillugit Inatsisartut inatsisissaattut Naalakkersuisut saqqummiussaannut Siumumiit ima oqaaseqassaagut.

Siullermik Naalakkersuisut Kulturikkut ingerlatsinermut tunngasut sunngiffimmilu sammisassaqtitsinerit pillugit ersarissaallutik inatsisissamik saqqummiussaqaarnerannut qujajumavugut.

Inatsit ullumikkut atuuttoq kulturikkut ingerlatsineq, sunngiffimmi sammisassaqtitsineq kiisalu timersorneq ataatsimoortillugit inatsiseqartinneqarsimasut maanna immikkut ersarissaavigineqarlutik inatsisiliuunneqartussanngorneri Siumumiit tigulluarparput.

Sunngiffimmi sammisassaqtitsineq inuiaqatigiinni uummaarissumik ingerlanneqarpat inuit peqqinnartumik susassareqatigiinnerup iluani inuuneqarnissaannut annertoorujussuarmik tunngavilii-sooqataasarput. Sunngiffimmi sammisassaqtitsineq kulturikkullu pinngorartitsineq tassaapput aamma kinaassutitsinnut timitalimmik ersersitsinitta takussutissartaasa ilaat.

Sunngiffimmi sammisassaqtitsineq nukittoq inuiaqatigiinni ineriartornermik ataatsimoornermillu pitsaasumik pilersitsiviusartut tamatta nalunngilarput, tassaniipporlu aamma meeqqat inuusuttullu peqqinnartumik inuuneqarlutik ineriartornissaannut toqqammavissat pitsaasut. Ullutsinni inooriaatsitta meerartatsinnik piffissap ilarujussua peqatiginnissinnaanerput kalluaqqavaa, taamaamallu inuiaqatigiinni peqqinnartunik ineriartorfiusumik imaqarluartumillu sunngiffiit imaqtinnis-saat pisussaaffiusut pitsaasumik naammassineqartariaqartut.

Inatsisinik pitsanngorsaanerit atoruminarsaanerillu siunertaminnut naapertuuttumik angusaqarfiusappata pingaaruteqarpoq nalorninaatsumik pisortat oqartussaaffiisa agguataarsimaneqarnissaat ersarissaavigissallugu, soorlutaaq aamma tusarniaanernit akissutit ilaat taamak oqariartuuteqartut.

Inatsit atuisussanut nalorninaatsuusariaqarpoq akisussaaffinnillu ersarissunik Namminersorlutik oqartussanit kiisalu Kommunenit akisussaaffigineqartut ersarissaavigineqarneritigut, tamannalu inatsit atuutilersinnginnerani qularnaarsimaneqartariaqarpoq.

Siammasissumik nunasseriaaseqarnitta naligiimmik periarfissaqartitsineq annertuumik unammillernartoqartippaa, sumiiffinnilu ataasiakkaani innuttaasut agguataarsimani ukiuni nutaajunerusuni annertooujussuarmittaaq sunnersimaneqarput. Sunngiffimmi sammisassaqartitsineq sumiiffinni ataasiakkaani sapinngisamik siammasinnerpaamik, sumiiffinnullu tulluernerpaamik kiisalu imaqarluartunik innuttaasunut neqerooruteqarsinnaaneq pingaaruteqarpoq, tamannalu peqqutigalugu sumiiffinni isorliunerusuni inuit piginnaasaminnik najukkaminni annertunerpaamik sunniuteqarsinnaajumallutik piginnaasaminnik qaffassaasinnaasarnissaat nunatsinnut nunassiriaatsitsinnullu naleqquttumik aaqqissuunneqartariaqartoq, ilinniartitaanikkut kiisalu piginnaasanik qaffassaanikkut.

Taamak oqaaseqarluta Inatsisartut inatsisissaattut siunnersuut ataatsimiitsitaliamut susassaqartumut ingerlateqqinneqarnissaa innersuussutigaarput.

Vivian Motzfeldt
Siumut